

sii dach edir nacht, weme dat denne de rad gebüt, de sal des horsam sin. We aver dat verhelde unde unhorsam were, solde der stad eyn punt geven.

Wanne ok eyn gemeyne geröchte edir klogkenslach wert, so sullen alle borgerssone, denstknechte unde medewonere, de tor were doghen, mede tomme gerochte jagen unde komen. We des nicht endeide, solde hir mit uns nicht wonen. Unde ^{a)} de burgere, de up armborsten edder bussen bruwen, de schullen darmede tor jacht komen unde to deme armborste sal eyn jowelk bruwer 1 schock pile hebben, unde de nicht enbruwen unde armborste hebben, schullen eyn jowelk $\frac{1}{2}$ schock pile hebben.

Wanne ^{b)} ok de rad ore borgere eysschet unde den borgeren luden let, sullen se komen unde horsam sin alse tomme gerochte.

Welk borger ok edir medewoner des nachtes buten der stad were in holte, velde edir up deme watere were unde verneme hovewerk, voytlude edir ander gerochte, de solde dat von stunt sunder sūmen hir deme borgermestere edir deme rade witlik dōn bii synen eyden.

We auch vor dem raide to schigkende hefft, sal dar nicht mer denne sulff dredde komen, et ensy denne, dat ome de rait des erlove eff de sake so gelegen were.

Na weme ok de raid sendet unde mit frevele uthebleve, de solde dat verboten na werderinge des raides.

Ock weme de furwachte gesat werdet unde der nicht engeit, so ome de geboden wert, edder de so bestellet, dat de so vorwart werde, de schal deme raide 5 β geven.

^{a)} Unde biß pile hebben wenig späterer Zusatz. ^{b)} Dieser Absatz durchstrichen und am Rande durchstrichenen Non est opus.